

辭書集成

辭
書
集
成

39

唐類函卷二十一

明東吳俞安期彙纂

明邵陽車大任校訂

帝王部一

帝王總載上

○帝王總載上

藝文類聚

禮記曰天子者與天地參德配天地兼利萬物與日月並明明照四海而不遺微小其在朝廷則道仁聖禮義之序燕處則聽雅頌之音行步則有環珮之聲升車則有鸞和之音居處有禮進退有度百官得其宜萬事得其序尚書刑德攷曰帝者天號也王者

人稱也天有五帝以立名人有三王以正度天子爵
稱也皇者煌煌也 禮斗威儀曰帝者得其根核王
者得其英華霸者得其附枝故帝道不行不能王王
道不行不能霸霸道不行不能守其身 春秋演孔
圖曰正氣爲帝間氣爲臣秀氣爲人 春秋考耀文
曰王者往也人所輪向人所樂歸 春秋繁露曰德
侔天地者稱皇帝天祐而子之稱天子 白虎通曰
帝王者號也號者功之表也所以表功明德號令臣
下者也 又曰接上稱天子者明以爵事天也接下
稱帝王者明位號天下至尊之稱 韓詩外傳曰君

者何曰羣也敢羣天下萬物而除其害者謂之君

管子曰明一者皇察道者帝通德者王謀得兵勝者霸又曰黃帝立明堂之議上觀於賢也堯有衢室之問下聽於民也舜有告善之旌而主不蔽也禹立諫鼓於朝而備訊也湯有總街之廷觀民非也武王有靈臺之宮賢者進也此古聖帝明王所以有而勿失得而勿止也韓子曰明王制其臣下者二柄而已矣二者刑德也殺戮之謂刑慶賞之謂德孫卿子曰人主者守至約而詳事至狹而切垂衣裳不下簞席之上而海內之民莫不願得以爲帝王董子

曰古之人造文字者三畫而連其中謂之王三畫者
天地與人也連中者通其道也取天地與人之才而
參之非王者其孰能當是故王者必法天以大仁覆
育萬物既化而生之又養而成之尸子曰孔子曰
商汝知君之爲君乎子夏曰魚失水則死水失魚猶
爲水也孔子曰商知之矣淮南子曰帝者體太一
王者法陰陽霸者則四時君者應六律體太一者牢
籠天地彈壓山川含吐陰陽申洩四時紀綱八極經
緯六合覆露照導普汜而無私翺飛蠕動莫不仰德
而生法陰陽者承天地之和形萬類之體含氣化物

以成形類則四時者春生夏長秋收冬藏取與有節
出入有時開闔張歛不失其序喜怒剛柔不雜其理
用六律者生之與殺也賞之與罰也予之與奪也非
此無道 又曰人主者以天下之目視以天下之耳
聽以天下之智慮以天下之力動是故號令能下究
而臣情得上聞百官修道群臣輻輳喜不以賞賜怒
不以罪誅 呂氏春秋曰始生之者天也養成之者
人也能養天之所生而為天子 又曰五帝先道而
後德故德莫盛焉三王先德而後事故事莫功焉五
霸先事而後兵故兵莫強焉 潛夫論曰太古之時

兆黎初載未有上下而自順序天末事焉君末設焉
末後矯處或相凌霍為萌巨害於是天命聖人使司
牧之勿令失性四海蒙利草木被德恭儉奉戴謂之
天子 帝王世紀曰孔子稱天子之德感天地洞八
方是以化合神者稱皇德合天地者稱帝仁義合者
稱王 又曰禮稱至道以王義道以霸觀高祖之取
天下也遭秦暴亂不階尺寸之資不摧將相之柄發
迹泗亭奮其智謀銜勒英雄鞭驅天下或以德致或
以義成事以權斷順逆不常霸王之道雜焉是以居
帝王之位而無一定之制三代之美固難及矣 蔡

邕獨斷曰上者尊位所在也太史令司馬遷記事當
言帝則依違之但言上不敢泄瀆言尊號者尊王之
義也乘輿出於律文曰敢盜乘輿服御物謂天子所
服食者也天子至尊不敢泄瀆言之故託於乘輿也
天子以天下爲家不以京師宮室爲常處當乘輿以
天下或謂之車駕天子自謂行在所今雖在京師言
在所行也巡狩天下所奏事處皆爲宮在長安則曰
長安宮在泰山則曰泰山宮唯當時所在 漢雜事
曰古者天子稱皇其次稱王秦承百王之末爲漢驅
除自以德兼三皇五帝故并爲號 六韜曰王者之

道如龍之首高居遠望深視而審聽神其形而散其精若天高而不可極若川深而不可測故可怒而不可怒臣乃爲虎可殺而不殺大賊乃發兵勢不行敵國乃強

帝王總載二

初學記

皇者天人之總美大之稱也易緯曰帝者天號也德配天地不私公位稱之曰帝天子者繼天治物改政一統各得其宜父天母地以養人至尊之號也大君者君人之盛也呂氏春秋曰帝者天下之所適王者天下之所往也洛書曰皇道缺故帝者興 天皇顏

竣始學篇曰天地立有天皇十三頭號天靈治萬八

千歲

洞冥記曰一姓十三人也徐整三五歷紀云歲起攝提元氣肇有神靈一人有十三頭號天皇

春秋緯云天皇地皇人皇兄弟九人分九州長天下也遁甲開山圖曰天皇被跡在桂州崑崙山下

地皇始學篇曰地皇十一頭治八千歲

遁甲開山圖曰地皇興於

龍門熊耳山

人皇始學篇曰人皇九頭兄弟各三百歲

依山川土地之勢財度為九州各居其一方因是而

區別

榮氏云人皇兄弟九人主於荆馬山身九色

有巢氏始學篇曰上

古皆穴處有聖人教之巢居號大巢氏

皇甫謐以為有巢在女媧

之後遁甲開山圖口石樓山在琅邪昔有巢氏治此山南

燧人氏尚書大傳曰

燧人為燧皇以火紀官

禮含文嘉曰燧人始鑽木取火炮生為熟令人無腹疾遂

天之意故
為燧人

太昊庖犧氏帝王世紀曰太昊帝庖犧

氏風姓也蛇身人首有聖德燧人氏沒庖犧代之繼

天而王首德於木為百王先帝出於震未有所因故

位在東方主春象日之明是稱太昊都陳制嫁娶之

禮取犧牲以充庖厨故號庖犧氏是為犧皇後世音

謬故謂之伏犧或謂之密犧

一解云慮古伏字後誤以慮為密故曰密犧左

傳曰伏犧氏以龍紀官

帝女媧氏帝王世紀曰女媧氏亦風

姓也承庖犧制度亦蛇身人首一號女希是為女皇

其未有諸侯共工氏任知刑以強伯而不王以水承木非行次故易不載及女媧氏沒次有大庭氏柏皇

氏中央氏栗陸氏驪連氏赫胥氏尊盧氏混沌氏有巢氏朱襄氏葛天氏陰康氏無懷氏凡十五世皆襲

庖犧之號

炎帝神農氏帝王世紀曰神農氏姜姓也長

於姜水有聖德以火承木位在南方主夏故謂之炎

帝都於陳在位百二十年而崩至榆岡凡八世合五

百三十年

陸景典語曰神農嘗草別穀蒸民乃粒食

黃帝有熊氏帝王

世紀曰黃帝少典之子姬姓也生于壽丘長于姬水

有聖德受國於有熊居軒轅之丘故因以為名以土

德王有妃生二十五子在位百年而崩年百一十歲

或傳以為仙或言壽三百歲故宰我疑以問孔子孔

子曰人賴其利百年而崩人畏其神百年而亡人用

其教百年而移故曰三百年

封禪書黃帝得仙上天羣臣葬其衣冠又帝王

世紀曰或言壽三百歲葬于上郡陽周之橋山

少昊金天氏帝王世紀曰

少昊帝名摯字青陽姬姓也降居江水邑于窮桑以

登帝位都曲阜在位百年而崩

古史考曰少昊以金德王故號金天氏或

曰宗師太皞之道故曰少皞

帝顓頊高陽氏帝王世紀曰顓頊

黃帝之孫昌意之子姬姓也生於若水首戴干戈有

聖德二十登帝位以水承金位在北方主冬以水事

紀官始都窮桑後都商丘在位七十八年年九十八

歲

又曰使南正重司天以屬神北正黎司地以屬民於是神民不雜萬物有序歲在鶉火而崩葬東郡

頓丘廣陽里

帝嚳高辛氏帝王世紀曰帝嚳姬姓也有

聖德三十而登帝位都亳以木承水在位七十年年

一百五歲而崩葬東郡頓丘廣陽里

陶弘景云在位六十二年

二十帝堯陶唐氏帝王世紀曰堯伊祁姓也從母姓

伊祁氏受封於唐年二十而登帝位以火承木都平

陽凡堯卽位九十八年年一百一十八歲乃殂百姓

如喪考妣三載四海遏密八音

葬于濟陰之成陽西北是爲穀林

帝舜有虞氏帝王世紀曰舜姚姓也其先出自顓頊

顓頊生窮蟬窮蟬有子曰敬康敬康生勾芒勾芒有

子曰橋牛橋牛生瞽瞍瞽瞍妻曰握登生舜於姚墟

故姓姚氏名重華字都君有聖德始遷於負夏販于

頓丘僨于傳虛家本冀州每徙則百姓歸之堯以二

女娥皇女英妻之

孟子曰堯之於舜使九男事之妻以二女焉百官牛羊倉廩備以養

舜於畎畝之中而後舉而加諸上位耕於歷山之陽耕者讓畔漁於雷

澤漁者讓淵陶於河濱陶者器不窳堯於是乃命舜

為司徒太尉試以五典舉八元八凱四惡除而天下

咸服遂納于大麓烈風雷雨弗迷堯乃命舜代已攝

政明年五月帝始受終文祖以太尉行事舜攝政二

十八年而堯崩三年喪畢舜年八十一以仲冬甲子

月次于畢始即真以土承火色尚黃以正月元日格

于文祖申命九官十二牧以禹為司徒舜年八十一

即真八十三而薦禹九十五而使禹攝政攝政五年